



Kalaallit Nunaannut suliffissarsiortarneq pillugu Inatsisartut inatsisaata allanngortinneqarnera pillugu Inatsisartut inatsisaattut siunnersuummik saqqummiussinissamik Naalakkersuisut peqquneqarnissaannik Inatsisartut aalajangiiffigisassaattut siunnersuut. Inatsisissatut siunnersuut nunatsinnut nuuttut kalaallit kulturiannik, oqaasiinik naleqartitaannillu ilinniarnissamut piumasaqaatitalimmik periarfissinneqarnissaannik aalajangersaassaaq. Inatsisissatut siunnersuut kingusinnerpaamik UKA2024-mi Inatsisartunut saqqummiunneqassaaq. Inatsisissamik piareersaasiorluni suliaqarnerup peqatigisaanik, Kalaallit Nunaanni inuiaqatigiinnut akuusitsilersitsinissamik inatsimmik atulersitsinissaaq pillugu Naalagaaffeqatigiinni oqartussaasunut Naalakkersuisut saaffiginnissuteqassapput.

(Inatsisartunut ilaasortaq Agathe Fontain, Inuit Ataqtigiit)

(Siullermeerneqarnera)

Qujanaq Inatsisartunut Ilaasortamut Agathe Fontain, Inuit Ataqtigiit uuminnga siunnersuuteqarneranut.

Maani nunami ammasuullutalu inussiarnersuuvugut. Avataaneermut nunatsinnut tikilluaqqusarpagut. Taamaattuaanassaarlut. Demokraatini iluarisimaarparput, avataaniit tikittut inuiaqatigiinnut tunniuttagaat sulinerallu. Maani nunami ikippallaarpugut, taamaattumillu kisimiilluta inuiaqatigiit suliassaatai tamaasa kivissinnaanagit. Taamaattumik avataaniit suliartortut sammisani amerlasoorpassuarni pisariaqartinneqarput.

Nunaqavissunik qaffasissunik ilinniarsimasunik taammattunik peqanngilagut, taassumalu kinguneraa, namminersortut pisortallu suliffeqarfiutai allatut ajornartumik avataaniit sulisussarsiortariaqartarmata. Suliartortartut ullumikkut pingaartumik Danmarkimeersuupput. Aamma atorfinnik nunaqavissunik inuttaliinissarput ajornartorsiutigaarput assersuutigalugu pisiniarfinni aammalu unnuisarfinni neriniartarfinnilu. Taamaattumik takusarparput, suliffiit taakku amerlanersaat ullumikkut inunnik kangianinngaaneersunik tigummineqartut.

Demokraatinut pingaartuuvoq, avataaniit suliartortut inuiaqatigiinnut akuulersinnissaannut oqimaaqatigiinneq eqqortoq, avataaniillu suliartortut inuiaqatigiinnut akuulersinnissaannut najoqqutassap eqqortup nassaarinissaa. Neqeroorutininik atorluarsinnaasunik neqerooruteqanngikkutta, inuiaqatigiinnut akuulersinnissaat iluatsilluassanngilaq, aammali avataaneersut namminneq iliuseqartariaqarput. Naggataatigummi inuup nammineq akisussaaffigimmagu inuiaqatigiinnut akuulernissani pissutsinullu naleqqussarnissani, najugaqarfimmini suliffimminilu, inuiaqatigiinnummi akuulersitsiniaaneq iluatsissinnaanngimmat kimulluunniit, akuulernissaminut kissaateqanngitsumut.

Taamaattumi isumassarsiatsialaavoq, nuuttut pitsaannerusumik oqaatsitsinnik, kulturitsinnik pingaartatsinnillu ilinniarnissamut pitsaannerusumik periarfissinnissaat. Tassuna atatillugu Demokraatinut qitiuvoq pingaartooq erseqqissassallugu, siunertarisat pitsaasut taakku piviusorsiortumik



naammasisussanngorlugit. Inatsisip oqaasertai ajunngikkaluarunikkuunniit pitsaasuullutillu, ullutsinni Kalaallit Nunaanni piviusorsioortumik naammassineqarsinnaanngikkunik, kingunissai pitsaasut annikittuaraassagunarput.

Demokraatit taakkuninnga oqaaseqaateqarlutik Naalackersuisut allannguutissatut siunnersuutaat ataatsimiititaliami susassaqartumi suliareqqinneqarnissaa innersuussutigaat.